

Pressiteedüs
11. jaanuar 2013
Uma Pido

III Umalõ Pido om hinnäst kirja pandnu 3600 lauljat - miä om rohkõmb ku kunagi varõmb.

III võrokiilnõ laulu- ni rahvapido Uma Pido peetäs timahavva 1. juunil Võro Kubijal. Hinnäst om kirja pandnu 150 kuuri 3600 lauljaga. Inämbüs neist om Vanalt Võromaalt, no tulijit om ka tõisist Eestimaa paigust, Lätist ja Soomõst.

Edimäne Uma Pido peeti 2008. aastagal Võrol, tönõ pido 2010 Põlvan, ni seokõrdne jälleki Kubijal. Peokotussõ jagaminõ Võro ni Põlva maakunnakeskuisi vaihõl näütäs Vana Võromaa üttheoitmist. Aoluulidsõ Vana Võromaa ala käü katõssa Lõuna-Eesti kihlkunda: Harglõ, Rõugõ, Karula, Vahtsõliina, Kanepi, Urvastõ, Põlva ja Räpinä.

„3600 lauljat om väegä uhkõ nummõr. Seo tõestas selget tahtmist ni vajadust tiidvüstä' ummi juuri ni neist juurist ka kinni hoita,“ ütles III Uma Pido vidäjä Zimmermanni Ursula ja lisas mano, et seo ei olõ õnnõ paikkundlik ettevõtmine, vaid üle-Eestilidsõ tähtsüsegä kultuuriüritüs. „Uma Pido om kõgõ suurõmb perändkultuuri pido umataolidsi hulgan. Tä liit hindän kats Eestile väegä tähtsät väärtüst – laulupidodõ kombõ' ni kotussõvaimu.“ Ka Uma Pido tunnuslausõ *Ku keskkotus kimmäs, sõs ladva' laulva'* kand hindän mõtõt, et tukõv hindätiidmine avitas üleilmastumisõ pöörüssen püsümä jäia'.

Edimädsel pidol oll' 2400 ja tõsõl 3500 koorilauljat. Inämbüs tinavuaastagatsõ pido 3600-st lauljast om peri Võro maakunnast (1400 lauljat) ja Põlva maakunnast (880), no ka Tarto (720) ni Valga maakunnast (250). Viil om kuurõ Harju, Jõgõva, Viljandi ja Rapla maakunnast ni Lääne-Virumaalt. Välisküläliisi om uuta Lätist (Vecelaicene ehk Vana-Laitsna segäkuur ja Ziemi naisikuur) ja Soomõst (Helsingi eestläisi segäkuur Siller).

Koorilauljit om mitund sorti: 1338 laul segäkoorin, 409 naisikoorin, 282 miihhikoorin, 144 poissõkoorin ja 1249 latsi- ni mudilaiskuurõn. Sis viil 173 kunnakoori lauljat, kiä omma pere-, sugu- vai sõpruskunna'. Seolgi pidol omma' kohal projektikoori „Naasõ' nurmõst“ ni „Mehe' mõtsast“ – lauluhimolidsõ naasõ' ja mehe', kiä külh egä päiv laulman ei käü', no „mobilisiirvä“ hinnäst just võrokeelitsõ laulupido jaos.

Pido kavan omma' rahvalaulu', rahvaligu viisi', klassikalidsõ' koorilaulu' ni vahtsõmba' kuurõlõ säetü laulu'. Lavastusligult palmitsas timahavvatsõ pido kokko Võhandu pühä jõgi. Tuuperäst om laulukavan pääle rokva *võro pavvõri* ka mõtiskõlõvit laulõ ni palvit. III Uma Pido lavalõsädjä om Tagametsa Tarmo.

III Uma Pido päädiregent Otsari Silja kõnõlõs, et Uma Pido laulu kõitvä egän iän kullõjit. „Kuurõ kava tetäs egä pido jaos vahtsõnõ. Hää om teedä', et võrokiilnõ lauluvara om pido kaudu kõvastõ tävvendüst saanu'.“ Otsari arvatõn tõmbas Uma Pido nii lauljit ku publikumi võro keele rikkusõga ja võrokõisi muhhe ni 'ummamuudu' olõmisõga. „Ummamuudu om hää olla', võrokõnõ om hää olla',“ om Otsar kimmäs.

Pidopäävä tähtis osa om samal pääväl Võro liinan peetäv Keriguplatsi laat käsitüü, aiakraami ni mahhetoodanguga, kontsõrtõ, laadalava ja tüütarriga. Pääväne tsirrul om ettevalmistus õdagudsõs pääkontsõrdis Võro Kubijal.

Lisateedüs:

Ursula Zimmermann

III Uma Pido vidäjä

ursula@wi.ee

Tel: 56 98 98 18

www.umapido.ee

umapido.wordpress.com

Pressiteedüse and' edesi:

Mari-Liisa Parder

II Uma Pido kommunikatsioonipäälük

mariliisa.p@gmail.com

Tel: 50 52 517